

佛祖統紀

八十七卷

風陵文庫

文庫19

F 229

9

淨土立教志第一 佛祖統紀卷二十七

山門禪定
蘭若藏本

天宋咸淳四明東湖沙門 志磐 撰

蓮社七祖

始祖廬山辯覺正覺圓悟法師慧遠師道安法師

二祖長安光明法師善導云是彌陀化身

三祖南岳般舟法師承遠

四祖長安五會法師法照善導後身師承遠師

五祖新定臺巖法師少康

六祖永明智覺法師延壽

七祖昭慶圓淨法師省常

四明石芝境法師取異代同修淨業功德高盛者立為七祖今故遵之以為淨土教門之師法焉

在凡具惑而能用三觀智顯本性佛如四明師之言
曰心境叵得故染可觀淨不礙緣生故想成相起唯
色唯心故當趣顯現斯觀佛三昧之正訣唯明宗得
意者能行之至若稱唱嘉號瞻禮尊容讀誦大乘持
奉淨戒皆淨業之正因正觀之助行而但修十善行
世仁慈者亦可以成回向莊嚴之績然則若定若散
若智若愚無一機之或遺雖登臺之有金銀入品之
有上下至於趣無生而階不退則一槩云耳悠悠末
代馮願行而升安養自廬山而來傳往生者纔三百
人意遐方外域不及知者奚若河沙之多是知此方
學佛道者機踈障重未聞有成而獨於念佛之宗無

間僧族皆足以取一生之證信矣哉撰淨土立教志
法師慧遠姓賈氏鴈門樓煩人幼而好學年十三隨
舅令狐氏遊學許洛博綜六經尤善莊老宿儒先進
莫不服其深致二十一欲度江從學范甯適石虎暴
死南路梗塞有志不遂時沙門釋道安建剎於太行
常山一面盡敬以爲真吾師也初聞安師講般若經
豁然開悟歎曰九流異議皆糠粃耳粃音比遂與母
弟慧持投簪受業精思諷誦以夜續晝因求直道場
沙門曇翼此自是北人非廬山人社者每給燈燭之費安師聞之
曰道士誠知人師神明英越志與理冥至二十四大
善講貫有客聞說實相義往復問難彌增疑昧師爲

引莊子之說以相比類感者釋然安師因許令不廢
外典常臨衆歎曰使道流東國者其在遠乎後隨安
師南遊襄陽值秦將苻丕爲寇乃分張徒屬各隨所
往耆德臨岐甘蒙誨益唯師不聞一言即跪請曰獨
無訓教懼非人類安師曰如汝者復何所慮師乃與
弟子數十人南適荊州居上明寺念舊與同門慧永
約結屋於羅浮太元六年晉孝武帝至尋陽見廬山間曠
可以息心乃立精舍以去永猶遠舉杖扣地曰若此
可乎當使朽壤抽泉言畢清流涌出尋陽亢旱師詣
池側讀海龍王經忽有神虵從池而出須臾大玉歲
竟有秋因名龍泉精舍求師先居廬山西林欲邀同

止而師學侶寢衆永乃謂刺史桓伊曰遠公方當弘
道而貧道所棲隘不可處時師夢山神告曰此山足
可棲神願毋他往其夕大雨雷震詰旦林麓廣闊素
沙布地梗枿丈梓充斥地上不知所自至伊大敬感
乃爲建刹名其殿曰神運以在求師舍東故號東林
時太元十一年也此山儀形九疊峻聳天絕而所居
盡林壑之美背負鑪峯旁帶瀑布清流環階白雲生
棟廬山記匡裕先生殷周之際受道於仙人即叢成
亦九派郡國志豐嶂九層包藏仙迹別營禪室最
居靜深凡在瞻履神清氣肅師聞天竺佛影是佛昔
化毒龍瑞迹欣感于懷後因邪舍律士敘迷光相乃

背山臨流營築龕室淡采圖寫望如煙霧復製五銘刻于石江州太守孟懷玉別駕王喬之常侍張野晉安太守殷隱黃門毛修之主簿殷蔚參軍王穆夜孝廉范悅之隱士宗炳等咸賦銘贊山見集先是尋陽陶侃刺廣州漁人見海中有神光網之得金像文殊誌云阿育王所造後商人於海東獲一圓光持以就像若彌縫然侃以逸武昌寒溪主僧僧珍常往夏口夜夢寺火而此像室獨有神護馳還寺果焚像室果存及侃移督江州迎像將還至舟而溺荆楚為之謠曰陶惟劔雄像以神標雲翔泥宿邈何遙遙可以誠至難以力招及寺成師至江上虔禱之像忽浮出遂迎

至神運殿造重閣以奉之因製文殊瑞像讚宜謂諸

教三昧其名甚衆功高易進念佛為先既而謹律息

心之士絕塵清信之賓不期而至者慧永同師安公光居西林

慧持遠師同母弟道生曇順並羅什門弟僧叡曇恒道丙曇誅

道敬並遠師門人佛駄邪舍此云覺明佛駄跋陀羅此云覺賢

迦維衛國人名儒劉程之號遺民張野周續之張詮宗炳雷

次宗等結社念佛世號十八賢復率衆至百二十三

人同修淨土之業造西方三聖像建齋立誓令劉遺

民著發願文而王喬之等復為念佛三昧詩以見志

師神貌嚴肅瞻仰者則心戰沙門有持如意致獻者

不敢陳白竊留座隅而去法師慧義強正少可謂師

弟子慧寶曰諸君膚淺故於遠公望風推服嘗至山
值師講法華欲致難輒內悸流汗出謂慧寶曰此公
言貌誠可敬服殷仲堪任荊州入山展敬與師俱臨
北澗松下共談易道終日忘倦仲堪歎曰師智識深
明實難庶幾師亦曰君之才辯如此流泉後人名其處曰聰明
泉司徒王謐護軍王默並欽慕風德遙致禮敬王謐有書
反盧循據江州入山詣師師少與循父遐同爲書生
及見循歡然道舊其徒諫曰循爲國寇得不爲人疑
師曰我佛法中情無取舍識者自能察之此何足懼
及宋武進詩循設帳桑尾左右曰遠公素在廬山與
循交厚宋武曰遠公世表之人何可疑也乃遣使馳

書遺以錢帛有行者來侍師善驅蛇蛇爲盡去因號
辟蛇行者有一虎往來時見行迹未嘗傷人人號遊
山虎師與社衆每遊憩上方峯頂患去水遠他日有
虎跑其石水爲之出因號虎跑泉又於一峯製涅槃
疏因名擲筆峯初是大教流行江東經卷未備禪法
無聞律藏多闕師乃令弟子法淨法領等遠越葱嶺
曠歲來還皆獲梵本昔安公在關中請曇摩難提出
阿毗曇心其人未善晉言頗多疑滯後僧伽提婆至
即請重譯及三法度論於是二論乃興師即製序以
貽學者聞鳩摩羅什入關遺書通好什答書曰傳譯
來貺粗聞風德經言末代東方有護法菩薩欽哉仁

者善弘其道。曇摩流支入秦。師遣弟子曇首請於關中。出十誦律。流傳晉國。西土諸僧咸稱漢地有大乘。開士每東嚮致敬。獻心。廬岳及佛駄跋陀羅至。師即請出禪數諸經。於是禪戒經典出自廬山。幾至百卷。先是此土未有涅槃常住之說。但言壽命長遠。師曰。佛是至極至極。則無變無變之理。豈有窮邪。乃著法性論十四篇。羅什見而歎曰。邊方未見經。便闇與理合。秦主欽風以大智度論新譯致書求序。師以其文繁廣。乃抄其要為二十卷。而為之序。羅什譯智論凡百卷。相玄征殷仲堪要師出虎溪。稱疾不往。玄將入山。左右曰。昔殷仲堪禮敬於遠。請公勿屈。玄曰。仲堪死人耳。及

玄見師。不覺屈膝。所懷問難。不復敢發。及語至征討。師即不答。玄後以震主之威。勸令登仕。師正辭以答。玄不能強。既而欲沙汰衆僧。下教僚屬曰。沙門之徒。未能申述經誥。禁行修整者。始可以宣寄大化。其有違於此者。悉當黜唯廬山道德所居。不在搜簡之列。師因致書廣立條制。玄悉從之。初庾冰輔政。以沙何應敬王者。何充奏不應禮。及玄在姑熟。復申冰議。師答書曰。袈裟非朝宗之服。鉢盂非廊廟之器。塵外之容。不應致敬王者。乃著沙門不敬王者論五篇。一明在家者有天屬之愛。奉主之禮。二明出家以求志。變俗以達道。豈得與世典同其禮敬。三明求宗不順。

化宗謂泥洹不變以化盡為宅泥洹即涅槃不生不滅不順化者其生可滅其神可冥冥神絕境謂之泥洹而不隨順於生生化化流動無窮之境斯所以不事王侯高尚其事豈復有所禮敬者哉四明體極不兼應謂歷代君王體極之主但務方內而不可並御於方外故曰不兼應天地之道切盡於運化帝王之德理極於順通與夫獨絕之教不變之宗優劣明矣若夫如來之道則無所不應矣五明形盡神不滅謂火之傳於薪猶神之傳於形火之傳異薪猶神之傳異形方生方死往來無窮但悟徹者反本感理者逐物耳有頃玄墓位即下書曰佛法宏誕所未能了初推奉主之

情故令與敬今事既在己宜盡謙光諸道人勿復致禮也相玄西奔安帝自江陵還京師輔國何無忌勸師候迎師稱疾不行帝遣使勞問師上書謝病帝復下詔慰答師嘗講喪服經當是禮記小記大記四制等篇雷次宗宗炳等並執卷承旨次宗後著義疏首稱雷氏宗炳寄書責之曰昔與足下面受於釋和上今便稱雷氏邪陸德明毛詩音義云周續之與雷次宗同受詩義於遠法師亦此類也釋慧要患山中無刻漏乃於水上立十二葉芙蓉因波隨轉分定晝夜以為行道之節謂之蓮華漏僧澈善篇讀寢至山南攀松而嘯和風遠集衆鳥悲鳴超然有自得之趣退諮於師曰律禁管絃歌舞若一吟一嘯可得為乎

師曰苟以亂意皆為非法澈唯而止師居山三十年
迹不入俗唯以淨土克勤于念初十一年澄心繫想
三觀聖相沈厚不言後十九年七月晦夕於般若臺
之東龕方從定起見阿彌陀佛身滿虛空圓光之中
有諸化佛觀音勢至左右侍立又見水流光明分十
四支流注上下演說苦空無常無我之音佛告之曰
我以本願力故來安慰汝汝後七日當生我國又見
佛馱邪舍慧持義熙八年先逝慧永義熙十年先逝劉遺民義熙六年先逝
在佛之側前揖師曰師志在先何來之晚師語法淨
慧寶曰吾始居此十一年中三見佛相今復見之吾
生淨土必矣又曰七日之期斯為漸矣即寢疾製遺

誡曰吾昔以知命之年託業此山自審有必盡之期
便欲絕迹外緣以求其志良由性弱於斷遂令同趣
相引時賢過眷情以類感不覺形與運類今年已八
十三矣仰尋違離之誨俯慨自負之心徒令此生虛
謝以悼往疾之深今於至時露骸松林之下即嶺為
墳與土木同狀此乃古人之禮汝等勿違苟神理不
昧庶達其誠大哀世尊亦當祐之以道門徒號慟若
喪父母師以世情難割乃制七日展哀至期始順寂
即義熙十二年八月六日也弟子不忍露屍與尋陽
太守阮侃奉全軀舉葬于西嶺累石為塔謝靈運立
碑以銘遺德張野作序自稱門人宗炳復立碑于寺

門以表德業師將終耆德請以鼓酒治病師曰律無
通文請飲米汁師曰日過中矣又請飲蜜和水乃令
披律尋文卷末半而終所著經論諸序銘贊詩記凡
十卷號廬山集刻梓在自佛圖澄道安師遠法師曇
順僧叡五世爲國師云唐宣宗大中二年追謚辯覺
大師昇元三年追謚正覺南唐李先主年號即大宋
太宗太平興國三年追謚圓悟大師凝寂之塔
法師善導不知何處人唐太宗正觀中見西河綽綽
師九品道場講誦觀經大喜曰此真入佛之津要修
餘行業迂僻難成唯此觀門速超生死於是勸篤精
苦盡夜禮誦續至京師擊發四部每入室互跪念佛

非力竭不休雖時寒水亦須流汗出則爲人演說淨
土法門三十餘年不暫睡卧般舟行道方等禮佛護
持戒品纖毫不犯好食送厨粗惡自奉乳酪醍醐皆
不經口凡有親施用爲彌陀經十萬卷盡淨土變相
三百壁壞寺廢塔所至修營然燈續明常年不絕三
衣瓶鉢不使人持行不共衆恐談世事長安道旌傳
授淨土法門者不可勝數從其化者至有誦彌陀經
十萬至五十萬卷者念佛日課萬聲至十萬聲者或
得入念佛三昧往生淨土者莫能紀述或問念佛生
淨土邪師曰如汝所念遂汝所願乃自念一聲有一
光明從其口出十至于百光亦如之其勸化偈曰漸

漸雞皮鶴髮看看行步龍鍾假饒金玉萬掌豈免衰
殘老病任是千般快樂無常終是到來唯有徑路修
行但念阿彌陀佛後忽謂人曰此身可厭吾將西歸
乃登柳樹向西願曰願佛接我菩薩助我念我不失
正念得生安養言已投身自絕高宗知其念佛口出
光明舍身精至賜號其寺曰光明

慈雲淨土略傳阿彌陀佛化身至長安聞漉水聲
曰可教念佛三年滿長安城皆念佛後有法照法
師即善導和上也

法師承遠始學于成都唐公至荊州進學于玉泉真
公真公授師以衡山俾為教魁人從而化者萬計有
弟子法照初居廬山由正定趨安樂國見蒙惡衣
侍佛者佛曰衡山承遠也出而求之肖焉乃從而學
傳教天下法照在代宗時為國師乃言其師有異德
天子南嚮而禮焉度其道不可徵乃名其居曰般舟
道場用尊其位師始居山西南巖石下人遺之食則
食不遺則食土泥茹草木其取衣類是南極海裔北
自幽都來求厥道或值之崖谷羸形垢面躬負薪樵
以為僕從而媒之乃師也凡化人立中道而教之權
俾得以疾至故示車念書塗巷刻溪谷不勤誘掖以
接于下不求而道備不言而物成人皆負布帛斬木
石委之巖戶不拒不營祠宇既具至德宗朝中詔褒

立是爲彌陀寺。正元十八年七月十九日終于寺。壽九十一。柳宗元爲述碑刻于寺門。

國師法照。唐大歷二年止衡州雲峯寺。慈忍戒定。爲時所宗。掌於僧堂。食鉢中觀五色雲。中有梵刹。當東北。有山澗石門。復有一寺。金書其題曰大聖竹林寺。他日復於鉢中見雲中數寺。池臺樓觀。萬菩薩衆。雜處其中。師以所見訪問。知識有嘉延曇暉二僧曰。聖神變化。不可情測。若論山川面勢。乃五臺耳。四年師於郡之湖東寺開五會念佛。當是五日。爲一會耳。感翔雲彌覆雲中樓閣。觀阿彌陀佛及二菩薩。身滿虛空。有數梵僧執錫行道。復見老人謂曰。汝先發願於金色界。禮

觀大聖。今何輒止。師遂與同志遠詣五臺。見寺南有光。及隨至佛光寺。一如鉢中所見。東北五里。果有大山。山有澗澗北石門。旁二青衣。一稱善財。一稱難陀。引師入門。北行見金門樓觀。金榜題曰大聖竹林寺。寺方二十里。一百院。皆有金地寶塔華臺玉樹。入講堂。見文殊在西。普賢在東。踞師子座。爲衆說法。菩薩萬數。共相圍繞。師於二菩薩前作禮。問曰。未代凡夫未審修何法門。文殊告曰。諸修行門。無如念佛。阿彌陀佛。願力難思。汝當繫念。決取往生。時二大士同舒金臂。以摩其頂。與之記曰。汝以念佛力。故畢竟證無上覺。文殊復曰。汝可往詣諸菩薩院。巡禮承教。師歷

請教授至七寶園。復回至大聖前作禮辭退。向二青衣送。至門外。師復作禮。舉頭俱失。後與五十僧往金剛窟。即無著。見大聖。忽覩衆寶宮殿。文殊普賢及萬菩薩。佛陀波利。師方作禮。舉首即失。夜於華嚴院。見寺東巖壑有五枝燈。師曰。欲分百燈。既而如願。復曰。願分千燈。數亦如之。光徧山谷。又前詣金剛窟。夜半見佛陀波利。引之入寺。後復於華嚴院念二大士。記我往生。乃一心念佛。忽見波利。謂之曰。汝華嚴已生。後三年華開矣。汝見竹林諸寺。何不使群生共知之。師因命匠刻石爲圖。於見處建竹林寺。旣畢。謂衆曰。吾事畢矣。數日別衆坐逝。推波利之言果三年也。

師大聖也師於并州行五會教化。人念佛。代宗於長安宮中常聞東北方有念佛聲。遣使尋之。至于太原。果見師。勸化之盛。遂迎入禁中。教宮人念佛。亦及五會。師子厚集南岳碑云。代宗時法照爲國師。

法師少康。縉雲周氏。母羅夢遊鼎湖峯。有玉女以青蓮華授之。曰。此華吉祥。當生貴子。及生。青光滿室。作芙蓉香。七歲。未語。相者奇之。母攜至靈山寺。指殿佛。謂之曰。汝敬佛。不遽答曰。我佛釋迦。誰不爲敬。父母愈敬異。遂舍。令出家。年十五。誦通法華楞嚴等五部。尋往會稽嘉祥學究律部。後詣上元龍興。聽華嚴。瑜伽諸論。唐貞元初。至洛下白馬寺。見殿中文籍放光。

探之乃善導和上西方化導文師曰若於淨土有緣
當更放光言已光復閃爍師曰劫石可磨我願無易
遂至長安光明寺善導和上影堂大陳薦幣候見遺
像升空而謂之曰汝依吾教廣化有情他日功成必
生安養師聞梵音如有所證乃南適江陵路逢僧曰
汝欲化人當往新定今嚴言訖而隱師既入郡人無
識者乃乞錢誘小兒曰阿彌陀佛是汝導師念佛一
聲與汝一錢兒務錢者隨聲念之月餘孩孺念佛覓
錢者衆師乃曰能念佛十聲者與一錢如此一年無
少長貴賤見師者皆稱阿彌陀佛念佛之聲盈滿道
場十年乃於烏龍山建淨土道場築壇三級集衆行

道師每升座高聲唱佛衆見一佛從口而出連唱十
聲則見十佛師曰汝見佛者決得往生時衆數千有
不見者嗚呼自責愈加精進二十一年十月三日屬
累道族當於淨土起忻樂心於閻浮提起厭離心汝
曹此時能見光明真我弟子遂放異光數道而逝郡
人爲建塔於臺巖漢乾祐三年天台韶國師勸入重
修其塔後人多指師爲後善導云

法師延壽字冲玄總角誦法華經五行俱下六旬而
畢吳越錢氏時爲稅務專知用官錢買魚鰕放生事
發當棄市吳越王使人視之曰色變則斬不變則命
之已而色不變遂貸命因投四明翠巖禪師出家衣

不續續食無重味復往參韶國師發明心要嘗謂曰
汝與元師有緣他日當大作佛事惜吾不及見耳初
往天台智者巖九旬習定有烏尺鴟音晏玉巢于衣
袂石得反後於國清行法華懺夜見神人持戟而入
師訶之曰何得擅入對曰久積淨業方到此中夜半
還像見昔賢前蓮華在手遂上智者巖作二闍音久
取手一曰一生禪定二曰誦經萬善莊嚴淨土乃冥心
精禱得誦經萬善闍乃至七度於是一意專修淨業
振錫金華天柱峯誦經三載禪觀中見觀音以甘露
灌其口遂獲辯才初演法於雪竇建隆元年本朝本
之忠懿王請住靈隱二年遷居永明今淨日課一百

八事未嘗暫廢學者參問指心為宗以悟為則日暮
往別峯行道念佛旁人聞螺貝天樂之聲忠懿王歎
曰自古求西方者未有如此之專切也乃為立西方
香嚴殿以成其志居永明十五年弟子一千七百人
常與眾授菩薩戒夜施鬼神食晝放生命皆悉回向
莊嚴淨土時人號為慈氏下生開寶八年二月二十
六日晨起焚香告眾加趺而化賜號智覺禪師師道
播海外高麗國王致書獻物敘弟子禮師以天台賢
首慈恩三宗互有同異乃館其徒之知法者博閱義
海更相質難師以心宗之衡以準平之又集大乘經
論六十部兩土聖賢三百家之言證成唯心之旨為

書百卷名曰宗鏡又述萬善同歸集指歸淨土最得其要師既亡起塔山中有僧來自臨川曰我病中入真得放還見殿室有僧像闍羅王自來頂拜我問此像何人主吏曰杭州壽禪師也聞已於西方上品受生王敬其人故此禮耳崇寧中追謚宗照禪師見本師傳

舒文臨安志

法師省常字造微姓顏氏錢唐人七歲厭俗十七具戒宋淳化中住南昭慶慕廬山之風謀結蓮社以西湖天下之勝遊乃樂嘉遁無量壽佛往生之仰止乃刻其像華嚴淨行品成聖之宗要乃刺血而畫之於是易蓮社為淨行之名士夫預會者皆稱淨行社弟

子而王文正公且為之社首一時公卿伯牧三十餘年預此社者至一百二十三人其化成也若此比丘同志復千大衆有以見西湖之擬於廬山者無慚德矣孤山作白蓮社主碑以紀盛績翰林承天禧四年宋白撰蓮社銘猶使孫何為之記正月十二日端坐念佛有頃厲聲唱云佛來也泊然而化衆見地色皆金移時方沒壽六十二弟子奉全身塔于烏窠禪師之墳側蓮社十八賢

東林慧遠法師

安法師門人

西林慧永法師

安法師門人

慧持法師

遠師弟安法師門人

道生法師

羅什門人

曇順法師

羅什門人

僧叡法師

以下五人並遠師門人

蔡恒法師

道昂法師

曇詵法師

道敬法師

覺明法師

梵僧佛
默邪舍

覺賢法師

梵僧佛
默跋陀

劉程之

以下六人並
隨師門人

張野

周續之

張全

宗炳

雪次宗

蓮社百二十三人

錄其可見者
三十七人

曇翼法師

以下五
人有傳

曇邕法師

僧濟法師

慧恭法師

法安法師

法淨法師

以下五人
元東林傳

法領法師

慧寶法師

慧要法師

僧澈法師

慧然法師

以下二人
見廬山集

曇成法師

道泓法師

以下二人
見持師傳

曇蘭法師

法業法師

以下四人
見跋陀羅傳

慧義法師

慧嚴法師

慧觀法師

曇果法師

見邑
師傳

元弼法師

見濟
師傳

僧光法師

以下三人
見恭師傳

慧堪法師

慧蘭法師

闕公則

有傳

畢穎之

見劉
傳

孟懷玉

江州刺史此下十
一人並見廬山集

王喬之

臨賀
太守

殷隱

晉安
太守

毛脩之

黃門
侍郎

殷蔚

主簿

王穆夜參軍

何孝之參軍

范悅之孝廉

張文逸處士

孟常侍二人失名

孟司馬

陸脩靜簡寂先生傳

不入社諸賢

陶潛彭澤令

謝靈運康樂公

范甯豫章太守

十八賢傳

東林法師見前蓮社十祖傳

西林法師慧永河內潘氏年十二出家事沙門竺曇
初習禪於恒山與遠師同依安法師期結宇羅澤

及遠師為安公所留師乃欲先度五嶺太元初至尋
陽刺史陶範素挹道風乃留憩廬山舍宅為西林以
奉師布衣蔬食清心克己容嘗含笑語不傷物峯頂
別立茅室時往禪思至其室者常聞異香因號香谷
一虎同居人至輒驅去遠師來之龍泉相伊為立東
林三十年影不出山師居西林亦如之嘗因法事至
近邑還山薄暮鳥橋營主醉騎馬當道遠師不聽去
師以杖指馬馬驚走營主仆地師捧慰之遂還營主
病往寺悔罪師曰非貧道意為禱之尋愈鎮南將軍
何無忌鎮尋陽至虎溪請遠公及師遠公持名望從
徒百餘高言華論舉止可觀師納衣半脛形定反荷

鎮提鉢松下飄然而至無忌謂衆曰永公清散之風
乃多於遠師也師標誠植願動在安養義熙十年在
疾忽斂衣求趺故起衆驚問師曰佛來也言終而化
異香七日方歇葬于寺之西南春秋八十三唐玄宗
朝詔重建塔亭追謚覺寂大師實智之塔

法師慧持遠公同母弟也幼讀書一日所記常敵十
日年十八與兄同事安公徧學衆經遊习三藏及安
公在襄陽遣遠公與師東下遂止廬山師形長八尺
納衣垂膝徒屬三百師爲上首陽章太守范甯請師
講法華經阿毗曇論四方雲聚瑯琊王珣與范甯書
問遠持二公孰愈甯曰誠謂賢兄賢弟殆復書曰但

令如弟誠未之有况復賢邪羅什在關中遇相欽敬
每致書通好隆安三年辭兄入蜀遠公留之曰人生
愛聚汝獨樂離師曰滯情愛聚者本不應出家今既
割欲求道正以西方爲期耳即悵然而別至成都郫
縣居龍淵寺大弘佛法升其堂者號登龍門義熙八
年順寂春秋七十六臨終遺命務嚴律儀專心淨業
以東間經籍付道侶西間法典付曇蘭以弘行業清
敏蘭神悟天發並能係軌師蹤焉

法師道生魏氏鉅鹿人幼從竺法汰出家披對經詰
一覽能誦年在志學便登講座吐納明辯雖宿望莫
敢酬抗初依廬山常以入道之要慧解爲本乃與僧

叡慧嚴慧觀等遊學長安從羅什受業關中僧徒咸
仰神悟嘗喟然歎曰自經典東流譯人重阻多滯權
文鮮通圓義若忘筌得魚始可與言道矣於是校閱
真俗精練空有研思因果乃立善不受報及頓悟成
佛義又著二諦論佛性常有論佛無淨土論應有緣
論並龍罩舊說妙有淵旨守文之徒嫌嫉競起師又
以法顯三藏所翻涅槃經本先至成文經云除一闡
徒皆有佛性師云夫稟質二儀皆是涅槃正因闡提
舍生之類何得獨無佛性蓋是經求末盡耳乃鳴闡
提之人皆得成佛時大本未傳孤明先發舊學僧黨
以為背經遂顯大衆擯而遣之師正容誓曰若我所

說背經當見身癘疾若與實相不并願舍壽之日踞
師子座遂拂衣而行及後大經至聖行品云一闡提
人雖復斷善猶有佛性於是諸師皆為媿服師被擯
南還入虎丘山聚石為徒講涅槃經至闡提處則說
有佛性且曰如我所說契佛心否群石皆為點頭旬
日學衆雲集忽雷震青園佛殿有龍升天因改寺曰
龍光師於寺請剎賓律師譯沙弥塞律傳於世既而
辭衆復投廬山預蓮社久之還都止青霞寺宋文帝
大會沙門親御地筵食至良久衆疑過中帝曰始可
中耳生乃曰白日麗天天言始中何得非中遂舉箸
而食一衆從之莫不歎其機辯時王弘范泰顏延之

並挹敬風猷相從問道元嘉十一年十一月庚子於
廬山升座說法將畢衆見聖尼紛然墜地隱几而化
宛若入定諸師聞之益信前誓有證此日葬于廬山
之西阜初關中僧肇始注維摩詰經世咸翫味師乃
更發深旨人服其妙所述維摩詰法華泥洹小品諸
經皆有義疏時以師能推闡提得佛之義於是顯其
頓悟不受報等論

法師曇順黃龍人幼出家承訓羅什講釋群經妙盡
色空無著之旨什歎曰此子奇器也後來廬山同修
淨業寧蠻校尉劉遵孝於江陵立寺要師經始感公
念佛三昧之道宋元嘉二年別衆坐逝異香滿室

秋七十九

法師僧叡冀州人遊學諸方嘗行經蜀西界爲人所
掠使殺羊有商客異之疑是沙門及問以經義無不
綜達即出金贖之後遊歷天竺諸國還至關中從羅
什諮稟經義羅什翻法華經以竺法護本云天見人
人見天什曰此言過實耳叡曰將非人天交接兩得
相見什喜遂用其文久之來入廬山依遠公修淨業
既而適京師止烏衣寺講說衆經聽者推服宋彭城
王義康要入第受戒師曰禮聞來學王乃入寺祇奉
戒法王以貂裘奉師常用敷坐王密令以錢三萬買
之師曰此雖非所宜服然王之所施不可棄也王聞

益加敬謝靈運篤好佛理殊方俗音多所通解等以經中字音求證於師因爲著十四音訓梵漢昭然元嘉十六年無疾告衆曰吾將行矣即面西合掌而亡衆見卧內一金蓮華倏爾而隱春秋八十五

法師曇恒河東人童孺依遠公出家年甫十三便能誦說內外典籍無不通貫德行清孤物情推服常有群鹿馴遶座隅自入廬山專志淨業義熙十四年端坐合掌厲聲念佛而化春秋七十二

法師道昞潁川人陳氏幼出家爲遠公弟子該通經律兼明莊老志節孤峻言與行合念佛三昧究心無間義熙十四年豫章太守王虔入山謁敬請爲山中

主用紹遠公之席兼以道源法嗣咸知宗仰元嘉十二年集衆念佛就座而化春秋七十一

法師曇講廣陵人幼從遠公出家勤修淨業兼善講說注維摩經行於世常著窮通論以明宿修述蓮社錄以記往生又能別識鳥獸毛色俊鈍之性洞曉草木枝幹甘苦之味妙盡其理人知其有密證云元嘉十七年集衆謂曰自建寺以來至此五十年吾之西行最在其後即加趺念佛百聲閉息遂絕春秋八十法師道敬瑯琊王氏祖凝之刺江州遂從遠公出家年十七博通經論日記萬言每歎戒律終身難全願淨六根但稟一戒以爲得度之要遠公知其堅正許

之篇志念佛晝夜弗替。遠公歸寂，乃入若邪山。宋末初元年，謂衆曰：「先師見命吾其行矣。」即端坐唱佛而化。衆見光明滿室，彌時方滅。春秋五十二。

法師佛默邪舍

晉言

蜀賓國婆羅門種有沙門至其

家乞食。父本外道，怒歐之，遂手足攣蹙。

音蹙，蹙，手足攣蹙也。

師謂曰：「坐犯賢聖，即請此沙門悔過旬日，乃瘞。」因令

邪舍出家。時年十三，隨師行曠野，與虎遇。邪舍曰：「虎已飽，必不傷人。」前行中道，果見餘骸，至十五誦經，日

至萬言，以分衛。廢業爲憂。梵語分衛，晉言乞食。一羅漢來代乞

食，年十九，誦經滿數百萬言，性度簡傲，不爲諸人重。至三十，猶爲沙彌，復從舅氏學五明論世間法術。

外道。皆有五明。內五明者：一、聲明，二、醫方明，三、咒術明，四、工巧明，五、因明。外五明者：前四並同，後一是符

印。至沙勒國，待遇隆厚。旣而羅什至，乃從學。阿毗曇論十誦律，什隨母反。龜茲師遂留止行化。符堅遣呂光伐龜茲，執羅什，師聞歎曰：「我與羅什未盡懷抱，今忽羈虜，相見何期？」後十年，師東至龜茲，盛弘法化。羅什在姑臧，遣信要之。師恐國人止其行，取清水以藥投之。咒數十言，與弟子洗足。即夜便發，比旦行數百里，追之不及。問弟子何所覺，邪答曰：「唯聞疾風流響，兩目有淚。」師又咒水洗足，乃止。旣達姑臧，什已入長安。聞姚主逼以妾媵，歎曰：「羅什如好綿繯，何可使入棘林。」羅什勸姚主遣使迎師。旣至，別立省寺於逍遙

園四事供養一無所受時至分衛一食而已時羅什
譯出十住經師更相徵決辭理方定師髭赤善解毗
婆沙論時人號赤髭論主秦弘始中譯出四分律十四
卷四長阿含經二十卷義熙八年來廬山入社後辭還本
國自蜀賓以盟空藏經一卷寄商客至涼州
法師佛跋跢陀羅晉云覺賢姓釋迦迦維羅衛國人甘露
飯王苗末也幼亡父母出家爲沙彌年十六博學群
經深達禪律常與僧伽徒多共遊蜀賓達多閉戶禪
坐忽見師來云暫往此率致敬彌勒言訖便隱後益
見其神變敬心祈問方知得不還果時姚秦沙門皆
敬之賓觀法衆清淨慨然東顧曰我路同輩去矣

真匠將何發悟即諮詢于衆孰能遂我所請流化東
土僉應之曰跋陀羅其人也嚴乃要師裹糧而行經
歷諸國至交趾附舶循海達于青州東萊間鳩摩羅
什在長安即往從之秦太子泓請師於東宮集衆說
法與羅什論色空義師曰汝抵說得果中色空不說
得因中色空什問何謂師曰一微空故衆微空衆微
空故一微空一微空中無衆微衆微空中無一微往
復數番羅什罔測秦主興供僧三千盛修人事而師
禪靜自守忽謂弟子曰吾見本國五舶俱發衆謂妄
言因共擯棄乃與弟子慧嚴慧觀四十餘人俱發至
廬山香谷茅舍而居爰蒲昌反詩召伯所爰住草舍時會蓮社遠公

謂師被擯過由門人懸記五船於律無犯即遣弟子
曇邕致書秦主為其解擯乃請師東林譯出禪數諸
經自是江東始耽禪悅師志在遊化西適江陵持鉢
分衛果見天竺五舶至此後還都立道場寺先是支
法領於于闐得華嚴梵本三萬六千偈未經宣譯義
熙十四年吳郡內史孟顗右衛將軍褚叔度請師為
主譯與沙門法業慧義慧嚴慧觀等為筆授譯成六
十卷有二青衣且從池出灑掃研墨師先後譯出觀
佛三昧經般泥洹經修行方便論及法顯所得大僧
祇律凡十五部宋元嘉六年念佛而化塔于廬山北
嶺

劉程之字仲思彭城人漢楚元王之後妙善老莊
通百氏少孤事母以孝聞自負其才不干時俗初解
褐為府參軍謝安劉裕嘉其賢相推薦皆力辭性好
佛理乃之廬山傾心自託遠公曰官祿巍巍何不
為答曰君臣相疑吾何為之劉裕以其不屈乃旌其
號曰遺民乃雷次宗周續之宗炳張詮畢穎之等同
來廬山遠公謂曰諸君之來豈宜忘淨土之遊乎程
之乃鑿石為誓文以志其事文見廬山集遂於西林澗北
別立禪坊養志安貧精研玄理兼持禁戒宗張等咸
歎仰之嘗貽書關中與什肇揚推經義著念佛三昧
詩以見專念坐禪之意始涉半載即於定中見佛光

照地皆作金色居十五年於正念佛中見阿彌陀佛
玉毫光照垂手慰接程之曰安得如來爲我摩頂覆
我以衣俄而佛爲摩頂引袈裟以披之他日念佛又
見入七寶池蓮青白其水湛湛有人頌有圓光曾出
卅字卅音萬是佛具萬德之相指池水曰八功德水汝可飲之程
之飲水甘美及寤猶覺異香發於毛孔乃自慰曰吾
淨土之緣至矣復請僧轉法華經近數百徧後時廬
阜諸僧畢集程之對像焚香再拜而祝曰我以釋迦
遺教故知有阿彌陀佛此香先當供養釋迦牟尼如
來次供阿彌陀佛復次供妙法華經所以得生淨土
由此經功德願令一切有情俱生淨土即與衆別卧

牀上面西合掌氣絕數子殯積土爲墳勿用棺槨時

義熙六年也春秋五十九

廬山集載感應事迹甚詳

張野字萊民居尋陽柴桑與淵明有昏姻契野學兼
華梵尤善屬文性孝友田宅悉推與弟一味之甘與
九族共州舉秀才南中郎府功曹州治中徵拜散騎
常侍俱不就入廬山依遠公與劉雷同尚淨業及遠
公卒謝靈運爲銘野爲序首稱門人世服其義義熙
十四年與家人別入室端坐而逝春秋六十九
周續之字道祖鴈門人父後過江因居豫章八歲喪母
哀戚過於成人十二詣范甯受業通五經五緯時號十
經童子養志間居窮研老易公卿交辟無所就入廬

山事遠公。預蓮社。以為身不可遺。餘累冝。絕遂終身。
不娶布衣蔬食。劉毅鎮姑熟。命為撫軍。復辟。太學博
士。俱不就。以慈康高士傳得出處之正。為之法。釋宋武
帝北伐。太子居守。迎館安樂寺。入講禮。月餘。復還山。
江州太守劉柳薦于武帝。辟太尉掾。不就。武帝踐祚。召
至都。問館東郭外。乘輿行幸。問禮經。傲不可長。與我
九齡。射於雙園。三義辨祈精異。上甚說。或問身為。勉士
時踐王廷。何也。答曰。心馳魏闕。者以江湖為桎梏。情
兩忘者。市朝亦巖穴耳。時號通隱先生。續之素患風
痺。不復堪講。乃移病鍾山。景平元年卒。春秋六十七。
張詮字秀碩。野之族子也。尚情高逸。酷嗜墳典。雖

鋤猶帶經。不釋朝廷徵為散騎常侍。不起。庾悅以其
貪起為尋陽令。笑曰。古人以客膝為安。若屈志就祿。
何足為榮。乃入廬山。依遠公。研窮釋典。深有悟入。宋
景平元年。無疾西向。念佛安卧而卒。春秋六十五。
宗炳字少文。南陽人。其母聰辯。富於學識。教授諸子。
皆有成。炳妙善琴書。尤精玄理。殷仲堪相玄並以主
簿辟。皆不就。劉裕領荊州。復辟。為主簿。答曰。棲丘飲
谷三十年矣。乃入廬山。築室依遠公。蓮社。久之。兄臧
為南平守。逼與俱還。江陵間居絕俗。劉裕辟太尉掾。
不就。二兄卒。累甚。衆頗營稼穡。武帝敕南郡長。時致
餼資。衡陽王義季在荊州。親至其室。炳角巾布衣。引

見不拜王曰。慶先生以重祿可乎。對曰。祿如秋草。時過即腐。宋受禪。徵爲太子舍人。元嘉初。徵爲通直郎。太子建徵爲中庶子。並不應。妻羅氏亦有高志。羅氏歿。炳哀之過甚。旣而悲情頓釋。謂沙門慧堅曰。死生之分未易可達。三復至教。方能遣哀。雅好山水。往必忘歸。西陟荆巫。南登衡岳。因結宇山中。懷尚平之志。以疾還江陵。歎曰。老病俱至。名山不可再登。唯澄懷觀道。卧以遊之。凡所遊履。悉圖之於室。謂人曰。撫琴動操。欲令衆山皆響。宋元嘉二十四年卒。春秋六十

九

雷次宗字仲倫。豫章南昌人。博學明詩。禮入廬山。預

蓮社。立館東林之東。元嘉十五年召至京師。立學館。雞籠山置生徒百員。除給事中。不拜。久之還南昌。公卿祖道以送。與子姪書曰。吾童稚之年。已懷遠略。弱冠託廬山。事釋和上。遊道餐風。二十餘載。端匠旣傾。復與汝曹歸耕先壟。山居谷飲。忽復十年。及今未老。尚可厲志。成西歸之津梁。自今以往。家務大小。一勿見聞。二十五年召拜散騎常侍。不就。復徵詣京師。築室鍾山。謂之招隱館。每自華林園入。延賢堂。爲太子諸王講禮經。是年無疾而卒。春秋六十三。子肅之。頗傳素業。官至豫章郡丞。

十八賢傳。始不著作者名。疑自昔出於廬山耳。熙

寧間嘉禾賢良陳令舉辭粗加刊正。大觀初沙門懷悟以事迹疎略復爲詳補。今歷考廬山集高僧傳及晉宋史依悟本再爲補治。一事不遺自茲可爲定本矣。

百二十三人傳

曇翼餘杭人初入廬山依遠公。後往關中見羅什東還會稽入秦望山誦法華經十二年感普賢大士化女子身披采服攜筠籠一白豕大蒜兩根至師前曰妾入山采薇上采服五采也穀俗下日已斜豺狼縱橫歸無生理敢託一宿師卻之力女復哀鳴不已遂令居草牀上夜半號呼腹疼告師按摩師辭以持戒

不應手觸女號呼愈甚師乃以布裹錫杖送爲案之翌日女以采服化祥雲豕變白象蒜化雙蓮凌空而上謂師曰我普賢菩薩特來相試郡太守孟頴聞于朝敕建法華寺衣寺天初餘杭山沙門法志常誦法華有雉巢于菴側翔集座隅若聽受狀如是七年一日忽雉粹志曰汝能聽經必生人道明且雉殯即爲瘞之夜夢童子拜曰因聽經得脫羽類今生山前王氏後其家設齋志方墮門兒曰我和上來也志撫之曰汝我雉兒也解衣視掖下有雉毳三莖七歲令入山出家十六落髮以掖有毳因名翼

曇邕楊氏關中人形長八尺雄武過人南來廬山依

師遠公內外典籍無不綜習立茅屋於山西以自居
止有弟子曇果澄思禪門一夕夢山神求受戒法果
曰家師在此可往求之邕忽見一人著袈衣音夾衣
風神端雅從者三十人求乞授戒師以果先夢知是
山神乃為說法授五戒畢神以外國二鋤為禮謝
而去師後往荊州行化卒於竹林寺

僧濟入廬山問道精悟深要遠公歎曰紹隆大法其
在汝乎及在疾遠公以燭遺之曰汝可憑此建心安
養師執燭停想延僧誦淨土經至五更以燭授弟子
元彌隨僧行道頃之夢自秉一燭浮空而行見阿彌
陀佛接至於掌徧事諸佛須臾而覺喜曰吾以一夕

願念便蒙接引明日復於空中見佛菩薩謂彌曰佛
來也即舉首西顧一息而終時方炎歊體三日不變
異香郁然

慧恭豫章豐城人與僧光慧堪慧蘭同志為學光等
學力不逮恭而於淨土繫想則過之蘭謂恭曰君雖
力學博聞豈不知經云如響奏音樂悅彼不自聞恭
曰學不可已孰能未死昧昧如癡哉後七年蘭等先
逝去時並有奇應又五年恭病且篤曰大道茫何
時可止死生去來吾何歸哉於是叩頭兩泣誓心安
養念不少間忽見無量壽佛以金臺前迎恭乘其上
見蘭等於臺上光明中而告之曰長老受生已居上

品吾等不勝尉喜但恨五濁淹延相依之晚耳恭於是日告衆欣然奮迅而滅時義熙十一年也

靈山集有恭道

人臨終感應事

法安初依遠公爲弟子妙善誦說兼習禪業律身持戒爲行尤精義熙中新陽邑社有暴虎居神廟樹下前後害民以百數安遊其村居民皆早閉門乃之樹下禪坐須臾虎負人至見安驚喜跳伏安乃爲說法授戒有頃而去明旦居民見安謂是神人相率禮敬因改神廟立寺宇請安居之左右田園並舍爲寺業掌設畫像須銅青慮不可致忽夢一人跪牀前云此下有銅鍾寤即掘之果得二鍾取青成像而以助

遠公鑄佛後不知所終

闕公則入廬山白蓮社既逝有同社人至洛陽白馬寺夜中爲公則修忌祭忽一時林木殿宇皆作金色空中有聲曰我是闕公則祈生極樂國今已得生矣言訖無所見

陸脩靜吳興人蚤爲道士置館廬山時遠法師居東林其處流泉匝寺下入於溪每送客過此輒有虎號鳴肉名虎溪後送客未嘗過獨陶淵明與脩靜至語道契合不覺過溪因相與大笑世傳爲三笑圖宋泰始三年羽化於京師賜謚簡寂以故居爲觀

雲笈七籤本傳

云元徽五年化

不入社諸賢傳

陶潛字淵明^亮晉大司馬侃之曾孫少懷高尚若
五柳先生傳以自況時人以爲實錄初爲建威參軍
謂親朋曰聊欲絃歌爲三徑之資執事者聞之以爲
彭澤令郡遣督郵至縣吏白應束帶見之潛歎曰吾
不能爲五斗米折腰拳拳事鄉里小人邪解印去
乃賦歸去來及宋受禪自以晉世宰輔之後恥復屈
身異代居尋陽柴桑與周續之劉遺民並不應辟命
世號尋陽三隱嘗言夏月虛間高卧北窓之下清風
颭至自謂羲黃上人性不解音高素琴一張絃徽不
具每朋酒之會則撫而和之曰但識琴中趣何勞

上學律往來廬山使一門生二兒舁籃輿以行時遠
法師與諸賢結蓮社以書招淵明淵明曰若許飲則
往許之遂造焉忽橫眉而去宋元嘉四年卒世號靖
節先生

謝靈運祖玄有幼晉室靈運爲康樂公主孫襲封康
樂公文章爲江左第一^{應爲江右}指金陵也嘗著木屐上山則
去前齒下山則去後齒尋山陟嶺必造幽峻至廬山
一見遠公肅然心服乃即寺築臺翻沮槃經鑿池植
白蓮時遠公諸賢同修淨土之業因號白蓮社^{或云東}
^池西二靈運嘗求入社公以其心雜而止之

范甯字武子篤學多所通覽時浮虛相扇儒雅日替

案以其源始於王弼何晏二人之罪深於桀紂乃者
論非之累遷中書侍郎朝廷疑議輒諮訪之出補諫
章太守大設庠序起學堂功用弥廣刺史王疑之上
言抵罪免官歸家遠公招之入社而寧竟不能往
廬山法師碑

法師諱慧遠本姓賈鴈門樓煩人弱而好學年十三
隨舅令狐氏遊學許洛故少爲書生二十一欲度江
就范宣子于時王路尚艱有志不遂於關右遇釋道
安一面定敬以爲真吾師也遂抽簪落髮求直道
場沙門曩翼每貸以燈燭之費安公曰道士誠知人
法師籍曠劫之神明表今生之靈智道情深遠識契

淵微般若無生之津道行息心之觀妙理與高悟俱
徹冥宗與深心等至安公歎曰使道流東國者其在
遠乎太元初襄陽旣沒振錫南遊考室廬阜結宇傾
巖同契不命而景響聞道誓期於霜雪自以年至耳
順足不越山栢氏以震主之威力爲屈致法師確然
貞固辭以老疾俄而制使沙門盡敬王者法師惟大
法之將淪抗言萬乘玄知不可強俯而順焉旣道漸
中土名流遐域外國諸僧咸東向禮非夫道深德廣
焉能使顯默同歸異域致敬且新經未表晉邦律藏
歷年莫正禪法甘露國所未聞實相宗本人有異說
法師深存廣圖大援群生乃命弟子迎請禪師究尋

經本論歷葱嶺，跨越沙漠，彌曠年稔，並甘歸還，既得傳譯，備盡法教，是故心禪諸經，出自廬山，幾乎百卷。又以心本二無，即色三家之談，不窮妙實，乃著法性論，理深辭婉，獨拔懷抱，羅什見論而歎曰：漢人未元新經，便闇與理會。若夫溫心善誘，發必遠言，栖寄林嶺，遊興能微，雖復風雲屢由，而無照昧之情，俯仰塵化之域，遊神無生之門，所謂言斯可發行，斯可察矣。自枕石漱流，始終一槩，恬智交養，三十餘載，春秋八十三，命盡絕，遺言露骸松林，同之草木，達生神期，既於此矣。古人云：道存人亡，法師之謂。凡我門徒，咸風徽之緬邇，傷語晤之永滅，敢以淺見，揚德金石，其

曰：九濟垂真，三乘歸佛，道往絕迹，慈還接物，孰是發蒙，昭我慧日，攝亂以定，閑邪以律，妙法常存，悠悠莫往，若人乘生皎皎，遠賞鑒我，鑒物知狹，知廣，息心空谷，訓徒幽壤，秦皇雄威，蔽理通情，王孫偏解，滯死達生，夫子之悟，屢劫獨明，仰高契峻，俯深懷清，惟清惟峻，若隔近絕，惟高惟深，志崇智潔，昔在香積，今也明哲，嗣之有人，實隆廢缺，捷度練數，甘露流津，律藏拂故，法性增新，凡厥希道，日知好仁，景薄命盡，宗領理湮，寒暑遞易，悲欣阜壤，秋蓬四轉，春鴻五響，孤松獨秀，德音長往，節有推遷，情無遺想，元熙二年春二月朔，康樂公謝靈運撰。

廬山法師影堂碑

天之高哉日星垂其耀地之厚哉山岳鎮其維稟兩
間之氣分五行之秀而得預稱於三才者其爲人道
之最靈者乎至若邁德宏域猷神慧境煥迦維之絕
照挹甘露之玄津並名岳而永崇瞻扶桑而不息則
慧遠法師其人也法師廬門標煩人賈氏釋道安之
門人英姿雅韻清行素節詳諸舊碑及張氏傳固以
齒映前秀鋪鑠令聞者矣灰心土骸而神機天發金
口木舌而法音雷震無取無舍而律儀永澈不生不
滅而淨性暉如抱德陽和而浩類洗心潛靈淵照而
遠方翹首修不共法而恒軫大悲熏般若智而寓諸

梵行故能誘納衆善令汰群疑萬流仰海而同歸一
雨施物而咸潤誠所謂阿摩勒果實從中生分陀利
華性非外染之爲義也自晉氏太元九年法師始飛
錫南嶺宅勝東林世更七代年垂四百流風遺澤逮
于今而人知懷仰故虎溪爲驛氏龍門廬阜即搢紳
闕里也皇唐貞元十有一年江州刺史馮翊嚴公士
良秉明德以分符宣中和而述職上贊緝熙之化下
臨擊壤之人以無爲爲政政克用乂巡徭外野指途
中林敷社禪闢式瞻遺像喟然歎曰斯名也寒暑不
能易其芳斯德也江海無以臻其極彼瑣行纖節尚
崇植楹廡正位居室豈尊美若茲而寓形在壁乃與

寺之上首熙怡律師圖建勝宇用昭真相旌美樹善
二謀同心說徒勸工成之匪日繡薨雲華時容景彰
觀至道者存妙像於鏡中珠微言者得玄珠於意表
豈止慧義備英姿而雨汗仲堪仰素風而心醉哉故
非夫遠公之至德不能譯聖文服秀民非夫嚴公之
澈識不能立清紀揚妙範蒙芳金石敬贊二美乃爲
之銘曰粹靈純綸寔惟至人含德摘曜昇陽發春道
光海域幽趣岳演六髦靈敞八士辭巾緣徂物謝
留事往百億神遊恒沙化廣昭昭遐軌冷冷未
日凝暉白雲翹想曠哉明牧仰味芳風思覲遺像求
之列壙爰建棟宇式是道宗旌休垂表地廣山崇唐

大中八年七月望日隴西李演撰三綱徒衆立
東林影堂六事

法師事迹誠多矣學者鮮能發其義使世不昭昭知
先賢之德予竊閱之了讀高僧傳蓮社記及九江新
舊錄最愛法師六事謂可以勸也乃引而釋之列之
影堂以示來者陸脩靜異教者而與語必過溪是不
以人而棄其言也陶淵明酒于酒而招之舍入社蓋
簡小節而取其達也跋陀高僧異說被擯而反延譽
之蓋重有道而矯嫉賢也謝靈運以心雜不取而果
歿於荆蓋識其器而知其終也盧循欲叛而執手求
舊蓋自信於義也桓玄振威而抗對不屈蓋自固於

節也。凡人之情，莫不畏威而苟合，忘義而避嫌。好名而昧實，黨勢而欺孤，飾行而惡累，自是而非人。孰有道爲世師，肯進異學之人乎？孰有德爲人尊，肯交醉鄉之徒乎？孰有自屈已學，禮斥逐之客，而推其爲大賢乎？孰有蚤明風鑑，拒盛名之士，而識其不令終乎？孰有不避禍患，昧故舊而信其義乎？自信仲同上孰有不懼威武，抗僭逆而全其節乎？此故法師德量宏太，獨出於古今之人者矣。若其扶荷至教，張皇聖道，垂裕於天人之際者，非蒙所能盡之。其聖與其賢，與偉乎哉！大塊噫氣，六合生風，公之大名也。遊龍翔鳳下，揖巢許公之高道也。四海秋色，神山中，聳公之風儀。

也。白雲丹壑，玉樹瓊草，公之棲處也。蒙後公而二雖慕且恨，敬瞻遺像，超然遐思，願以藝文書于屋壁。大宋慶歷元年仲春，鐔津沙門契嵩書。

淨上立教志第一

淨土立教志第二

佛祖統紀卷二十八

天宋景定四明東湖沙門

志磐

撰

往生高僧傳

晉嘉祥慧虔法師

宋江陵曇鑑法師

宋江陵道海法師

宋淮南曇泓法師

宋東轅道廣法師

宋弘農道光法師

宋交趾曇弘法師

齊高座慧進法師

梁廬山道珍法師

魏壁谷曇鸞法師

齊北洛陽慧光法師

齊北晉原法琳法師

齊北鄴都僧柔法師

周北長沙慧命法師法音法師附

周北多寶僧崖法師

隋廬山智舜法師

隋河東智通法師
隋南岳慧思禪師
隋枝江慧成禪師
隋章安灌頂禪師
隋天台等觀禪師
隋開覺道喻法師
隋國清法智法師
唐揚都法祥法師

隋麻谷真慧法師
隋天台智顗禪師
隋仙城慧命禪師
隋瓦官法喜禪師
隋碧澗法俊禪師
隋汾陽壽洪法師
唐博野善曹法師
唐興善明瞻法師

唐壁谷道緯法師

道撫法師附

唐魏州道昂法師

唐虎丘智琰法師

唐蒲州神素法師

唐浚儀功迴法師

唐并州惟岸法師

僧童

唐江陵法持禪師
唐成都雄俊法師
唐悟真啓芳法師
唐襄陽辯才法師
唐丹丘懷玉法師
唐吳郡神皓法師
唐泰山大行法師
唐臨淄善道法師
唐鄭州智欽禪師
唐千福懷感法師
石扶風志通法師

唐慈愍慧日三藏
唐并州僧銜法師
唐悟真圓果法師
唐重林白覺法師
唐虎丘齊翰法師
唐西河僧藏法師
唐荊州惟恭法師
唐長安寶相法師
唐終南法順法師
唐會昌德美法師
宋錢唐紹巖法師

宋水興守真法師
宋寶雲義通法師
宋慈雲遵式法師
宋神照本如法師
宋淨慧思義法師
宋淨住從雅法師
宋慈行智深法師
宋檀菴有嚴法師
宋桐江擇瑛法師
宋一行宗利法師
宋憲帝仲閔法師

宋慈光晤恩法師
宋法智知禮法師
宋興國有基法師
宋廣慈慧才法師
宋辯才元淨法師
宋仙潭若愚法師
宋神悟處謙法師
宋明智中立法師
宋淨住思照法師
宋慧覺齊玉法師
宋雪川瑩珂法師

別章法師附

宋超果靈照法師
宋淨慈宗本禪師
宋靈芝元照律師
宋長蘆宗曠禪師
宋靈芝思敏律師
宋化度法持律師
宋七寶用欽律師
宋錢唐惟渥法師
宋淨光冲益法師
宋阮社晞湛法師
宋法安太微法師

宋四明可久法師
宋大通善本禪師
宋會稽道言律師
宋化城惟月律師
宋明慶行詵律師
宋延壽慧亨律師
宋會稽妙生律師
宋報恩仲明法師
宋雷峯法宗法師
宋淨住曇懿法師
宋法安思聰法師

開元久法華

宋木訥了義首座

宋資聖慧誠法師

宋南祖祖南法師

宋廣壽法因法師

宋智涌了然法師

宋真教智仙法師

宋北關思淨法師

命彌陀

宋假名如湛法師

宋西山思梵法師

宋寂光淨觀法師

宋法慧利先法師

宋普靜師安法師

弘華嚴

宋覺華如寶法師

宋永壽顯超法師

宋下步有開法師

宋興福道生法師

宋嘉會若觀法師

宋龍泉聖異法師

宋祇園智印法師

宋湖心元肇律師

山月

宋隆樂戒度律師

宋圓辯道琛法師

山月

宋牧菴有朋法師

宋慈室妙雲法師

四明

宋雪溪晞顏首座

四明

宋南湖了宣行人

宋南湖善榮行人

宋明心祖輝法師

宋塔山如鑑法師

宋福源祖新法師

往生高僧傳

慧慶嘗末居廬山見遠公德業之盛歎曰吾人也彼人也乃之山陰嘉祥寺聚徒講經謂衆曰願乘誦導用奉彌陀後五年知時已至乃曰華開見佛即其時矣其夕有尼淨嚴假寐之頃見觀音勢至與百千衆從空而下嚴問大士何所之曰嘉祥迎慶公耳慶亦願感勝相以告弟子奄然長往異香經旬不歇

曇鑑宋時居江陵定中感佛以水灑面曰滌汝塵垢
清汝心念一夕念佛步廊及且趺坐而化同時江陵
道海淮南曇泓東轅道廣弘農道光臨終皆見金臺
來迎之相

曇弘南適交趾誦觀經不記數於山嶺聚薪焚身得
舍利數百人見弘身金色乘金鹿向至去

慧進齊永明初於揚州高座寺發願誦法華用嚴淨
土執卷病生乃復造經百部以悔宿障部帙既滿病
亦隨愈聞空中聲曰汝事已辦汝願已遂欲生淨土
非汝而誰一日無病念佛而化

珍梁天監中寓廬山慕遠法師標心淨土異時夢

中見十人舟舫浮海問何往曰適安養國珍曰願得
隨往答曰一日之修功超永劫子未誦彌陀經未曾
浴僧何可求往珍乃大設沐浴專誦彌陀經後二年
有捧銀臺至者曰以法師之功當得金臺奈何始心
猶豫故止此耳珍曰苟見佛之基有漸矣必金臺後
亡之夕所居山崖烈火千炬鄉民大驚且則知珍遷
化

曇鸞初爲術學就陶隱居得仙經還洛下遇菩提流
支問曰佛道有長生乎支笑曰長生不死吾佛道也
即授以觀經曰能解此則三界無復生六道無復轉
師承其語遂焚毀仙經晝夜專誦觀經修三福業觀

想九品北魏主嘉之號神鸞救住汾州玄中寺一夕
正持誦見梵僧入室謂曰吾龍樹也以汝有淨土之
念故來見汝鸞曰何以教我僧曰已去不可及未來
未可追見在之何在白駒難與回言訖不見鸞即令
弟子同音唱佛西向瞑目而化
慧光北齊時居洛陽著華嚴涅槃十地等疏妙盡權
實之旨一日有疾見天衆來迎光曰我所願歸安養
耳已而淨土化佛充滿虛空光曰唯願我佛攝受遂
我本願即彈指聲歎言氣俱盡

法琳晉原人常誦觀經輒見一僧大身在前北齊建
武二年感疾見寶樹下一佛二大士像坐蓮華上

大慰喜夜半聞鐘聲眾就視之即席而化

僧柔學方等諸經齊文宣詔至鄴下柔唯以淨業爲
懷亡之日見化佛千數室內外聞異香西望敬禮即
時遷神

慧命北周長沙人十五誦法華纔七日終一部與法
音爲淨土友一夕攜手月下相顧笑曰時至不行爲
貪生西方有期吾其去矣音曰寧不俟我十日命豎
兩指曰過此不可也越二日果終衆見天人下降奇
香異樂或唱善哉後十日音亦亡祥瑞悉與命同
僧崖北周益州多寶寺發心燒五指萬人擁觀謂弟
子曰我去後好共養病患醜陋人此皆佛菩薩權化

也坐亡之時。衆見寶華紛紛。師披納執錫。口鳴佛號。與數十僧乘空西去。

智舜入廬山。踵遠公。修淨業。講觀經。才終。即示病。見鸚鵡孔雀。念佛念法。皆微妙聲。告弟子曰。我今日往生矣。既而果遷化。時隋大業初。

智通。隋河東人。常誦先賢讚佛偈三十首。每六時對像。引聲高唱。委曲淒切。聞者悲之。大業七年。與門人頂蓋同聖。念佛忽見光明勝異。寶幢華幔。謂蓋曰。吾生淨土。克在今夕。即坐亡于懺堂。衆見樓閣千重。排空而去。猶雲霧然。

其慧隋大業初。居蒲坂麻谷。餌黃精。絕粒。築淨地。設

四柱寶幢。以奉一聖。每依像作觀。挺身整念。必肅肅然。一夕謂弟子曰。今見蓮華載開。載合。將承吾足。頃之聞鐘。天香西來。異光驟發。已而慧亡。

慧思陳時。來居南岳。專誦法華。嘗夢阿彌陀佛。彌勒佛。與之說法。夏竟。受歲。豁然大悟。法華三昧。所未聞經。不疑自解。後將順世。即集門學。連日說法。端坐。唱佛來也。即合掌而逝。

智顗居天台。初往大獼山。禮思禪師。思曰。昔日靈山同聽法華。宿緣所追。今復來矣。乃授法華三昧。三七日。法誦經至。是真精進。是真法。供養如來。豁然見靈山一席。儼然未散。後於石城石像前。將示寂。合唱

無量壽佛及觀經首題合掌讚曰四十八願莊嚴淨
土華池寶樹易往無人火車相現一念改悔尚得往
生况戒定熏修行道力故實不唐捐又曰吾諸師友
侍從觀音皆來迎我言訖加趺唱三寶名如入三昧
慧成居枝江誦阿彌陀經修西方觀三十年常坐不
卧每入定見淨土蓮臺寶樹臨終之夕人有夢成乘
蓮華上隱隱西沒

慧命天台仙城人臨終誡門人精進淨行衆忽見阿
彌陀佛領衆來迎師隨佛後向西而去

灌頂章安人臨終示疾室有異香因誡誨弟子畢忽
起合掌稱阿彌陀佛二天士名奄然而化

法喜常行方等禮懺有一雉來責命神人斥之曰法
師當往生淨土豈償汝命後於病中發願以一生所
修行業回向淨土至心念佛即見佛菩薩衆來迎端
坐而化

等觀居天台常誦法華一夕澡浴面西趺坐念佛菩
薩及智者名復說三觀法門言畢而終

法俊住碧澗寺行法華三昧即獲悟入示滅之日仙
樂盈空天香亘野衆見凌空西向而去

道喻居開覺寺念阿彌陀佛日夜不廢造其像僅三
寸後於定中見佛謂曰汝造我像何小喻曰心大即
大心小即小言訖見像身徧滿虚空告曰汝且回本

國香湯沐浴明星出時我來迎汝至時感化佛來迎
光明滿室

壽洪汾陽人常念往西方將亡見兜率天童子來迎
師曰我心期西往不生天上即令衆念佛遽云佛從
西來矣言訖而化

法智居國清寺一心念佛常感觀音執至來下光映
其身謂所親曰吾生淨土有日矣誰能具食餞我衆
爲具之食訖無他異衆疑其悔宿房以候之夜未央
忽安坐牀上念佛而化有金光自西來江上漁人誤
謂天曉已上並

善曹博野人勤篤淨業常見佛大士像放光照身一

夕疾中候起合掌祝曰佛以四十八願攝我有情必
冀此時如佛本願已而告衆曰佛光照我所願無失
言訖而亡

法祥住揚都大興國寺三十年修安養之業凡有饒
益必用回向因在疾弟子聞師稱佛聲甚厲又見房
西壁有光若鏡現淨土境相頻伽鼓翼祥條然而化
明瞻晚歲克志安養或譏其遲暮瞻曰十念功成猶
得見佛吾何慮焉後因疾於興善寺具齋別道俗時
僕射房元齡杜如晦皆會焉日過午整威儀遽曰佛
來矣二大士亦至疎身合掌而化

道綽入壁谷玄中寺曩鸞之舊居也專志念佛日以

七萬餘爲度勸并汾人念佛或以豆記所度者及萬斛四月八日集道俗爲如來生朝慶會俄見雲空中乘七寶船謂綽曰汝淨土堂宇已成衆復見化佛菩薩飄飄在空皆忤忤歎異同志道撫者每相見必指淨土爲會綽亡三日撫問之曰吾常期先行今乃在後吾加一息之功見佛可追矣即於像前叩頭陳露退就其座而化

道昇平時修淨土業一日升高座誡師徒衆遽揖曰彼天衆何雜沓而來天道由來非所願若淨土相迎即聞命矣因瞋目久之曰阿彌陀佛光明照我諸化菩薩又來會此於是捧鑑叩首陳髮忽鑑墜而化

晉琰居武丘集僧俗修淨業觀想每月一集五百餘人後於病中見梵僧手執寶瓶前謂之曰吾無邊光也卻後淨土所稱功德寶王乃我爾琰與寺衆論曰無邊光勢至大士功德寶王其成佛之號也我其西歸乎其久竟亡

神素居蒲州誦阿毗曇成實論願早登安養後病中令弟子讀觀經靜坐而聽既畢唱佛大士號始終數番至中夜安坐而化

功迴浚儀人行普賢懺身不倚者三十年一日普賢來乘六牙象地皆銀色脫屣專講法華每至藥草喻品天輒降雨又撰佛地論疏願回所證之益得生淨

土疏成五色異光照其室迴曰得於此時乘光見佛
願足矣乃繫念西想不食而化

惟岸并州人常修十六觀門曾因出觀見觀音勢至
現於空中岸頂禮兩淚曰幸由肉眼得觀聖容所恨
世無傳焉倏有二人執善畫聖相既就人亦俱失乃
謂弟子曰吾西行其時也有從我者乎一小童曰惟
師之命即往白父母歸寺沐浴至像前跏趺坐而化岸
撫其背曰汝何先吾而行即令弟子助聲念佛仰目
西顧寂然無聲

法持江寧人見黃梅忍禪師悟心契繼牛頭祖位常
於淨土俯仰不違將終戒弟子

食我血肉起淨土因弟子如其旨見旛旛數十西來
遮山旛出異光以燭其室

慧日沈船南海至天竺諸國訪善知識問何國何方
有樂無苦何法何行速得見佛天竺三藏皆讚淨土
日聞喜躍至憍陀羅國山有觀音像祈請者或現身
日絕食七日畢命為請七日之夜觀音於空中現紫
金相長丈餘手摩日頂曰汝欲傳法利人又願生極
樂國當如汝志開元七年東歸達長安進佛真容梵
文帝旌其德賜號慈路三藏著淨土文行於世天寶
七年將終見蓮華在前狀如日輪
雄俊成都人善講說得財幣必非法而用又罷僧入

軍尋因逃難復入僧中衆多畏避之後聞經云十念佛滅八十億劫重罪喜曰賴有此耳自後當造非口輕念佛然若存而亡猶伶倫之爲戲一夕暴亡冥王曰誤追汝也然汝積惡多矣宜略經塗炭即令牛頭驅入地獄俊大呼曰十念阿彌陀佛能滅八十億劫重罪况我未臻五逆十惡又多念佛豈當至此獄卒不敢陵逼即以其語報王王召至謂曰汝念佛本無深信可且回世上更厲初心俊屢以語入時謂之地獄漏網俊乃入西山專意念佛後四年同輩訪之俊喜曰汝見親知當言雄俊以念佛力得生淨土毋以爲地獄漏網人也語項即坐脫

僧術并州人初念慈氏期生內院年九十遇絳禪師聞淨土之法始回心焉早暮禮佛千拜念佛萬聲三年有疾謂弟子曰阿彌陀佛授我香衣觀音勢至示我寶手吾其去矣既終七日異香不散時啓芳圓果二師目擊斯事乃於悟真寺觀音像前折楊枝置像手誓曰芳等若於淨土有緣當使七日不萎至期枝益茂芳果慶拈晝夜觀念不捨數月忽覺臨七寶池入大寶帳見佛及二大士坐寶華臺光明輝映芳果前作禮佛告之曰汝念我名皆生我國又見寶旛珠網有梵僧御寶車中謂曰吾法藏也故來迎汝芳果忽覺乘車前邁又聞釋迦佛文殊菩薩以梵音聲稱

讀淨土寶殿之中有寶階三道第一道純是白衣第一道僧俗混半第三道唯是僧輩佛指謂芳曰此皆閻浮提念佛之人得生此土也後五日二人無病忽聞鐘聲芳果曰鐘聲我輩事也當時俱即化去
辨才襄陽人潛修淨土之業二十年未嘗斷獨與道我任公善謂之曰才必生淨土期在十年後今弟之報任公曰向所期已及矣任公及門才曰吾其去矣
跌坐而化衆聞仙樂西來異香散滿

自覺居平山重林院爲鬼神講說者三年屢有祥感
年發四十八願因觀音大悲接見阿彌陀佛乃率
衆建壇大悲像四十元尺俯伏像前陳其願曰聖

相已就梵宇已成願承聖力早登安養夜中忽見金色祥光二道佛及菩薩左右隨之佛垂手按覺首曰
守願勿易利物爲先寶池半庭終當如願後十一年
見天神雲中出半身謂之曰安養之期已至即於像
前加趺而化

懷玉丹丘人觀想淨土將四十年日課佛名五萬誦
淨土諸經通三百萬一日見西方聖殿有擎銀臺而
至師曰如我本望必得金臺言發而臺隱師彌加精
苦三七日後向人復來曰法師已得上品生忽異光
照室越三日晝偈曰清淨皎潔無塵垢蓮華化生爲
父母我經十劫修道來出示閻浮厭衆苦一生苦行

超十劫來離娑婆歸淨土弟子見佛菩薩共御金臺
西下迎玉而去

齊翰居武丘入流水念佛道場一念之頃即見淨土
境相忽作歌曰流水動兮波連漪芙蓉輝映兮寶光
隨乘光西邁今侍者誰初師十年在疾弟子問曰和
上舍生何乃抱病師曰必謝之軀雖聖未免即回瞻
聖像而亡

神皓於吳郡結道俗為西方社有不能遺塵累者引
退之時以為栴檀林中常才自枯後示疾謂弟子曰
淨土聖相已現吾今夕必往生乃裸身易衣端坐而
化香氣滿室

西河人夏月在草間餒敗念阿彌陀佛二十許
年飲食行坐志在安養忽於病中見化佛光照其身
次日謂侍者曰吾適瞑目正在淨土諸上善人散華
召我乃整衣西向而終

大行入泰山行普賢懺三年感大士現身晚歲入藏
室陳意隨手取卷得彌陀經乃日夜誦詠至三七月
觀流離地上佛及二大士現身其前僊宗聞其事詔
入內賜號常精進菩薩封開國公後一年流離地復
現即日右脇而終異香旬不散肉體不壞
惟恭判州人常事酒博數暇則誦經祈生安養同寺
靈巖跡頗類之判人嘲之曰靈巖作盡業惟恭避其

跡。地獄千萬重。莫厭排頭入。恭聞之曰。我佛閱我造惡。接我塗炭。豈有地獄之入。一日恭病。歸出寺。有所往。逢少年七人。手執樂器。如寺之樂佛狀。曰。我來自西方。惟恭上人。寺何在。恭指之。即於懷出金瓶。取蓮華。如拳。漸開。葉葉出。異光。望寺而馳。歸大驚。不敢回顧。次日。回寺。則恭已夕亡。歸因感悟。卒守名節。為高德云。

善道臨淄人。入大藏。信手探卷。得觀無量壽佛經。乃專修十六妙觀。及往廬山。觀遠公道躡蹻。豁然增恩。後遁跡終南。修般若三昧。數載。觀寶閣瑤池。宛然在目。主晉陽從綽禪師。授無量壽經。入定七日。綽請觀

所生處。道報曰。師當懺悔三罪。方可往生。師曰。生處。佛像在簷牖下。自處深房。此一罪也。當於佛前懺。又掌役使出家。人此二罪也。當於四方僧前懺。又因造屋多損蟲命。此三罪也。當於一切衆生前懺。綽靜思往。各洗心悔謝。久之。道因定出。謂綽曰。師罪滅矣。後有白光來照之時。是往生相也。道行化京師。歸者如市。忽微疾。即掩室。怡然而逝。異香大烈。向西而隱。

寶相。居長安。六時禮懺者三十年。夜誦彌陀經。七過佛號。六萬聲。後忽見佛大士衆。自西來迎。囑諸徒曰。念佛為業。西方相待。

智欽專習禪業。又禮一萬五千佛名。一百篇後。於鄭

州阿育王塔所燒一臂願生淨土。弟子僧護夜半見庭前光照異常。因問何人。秉炬凡三問。空中聲云。來迎欽。禪師耳護。急推窓觀之。即見佛身光明。燿華寶蓋。騰空飛下。欽應時化去。

法順杜氏。每遊歷郡國。勸念阿彌陀佛。著五悔文。讚歎淨土。弟子至五臺。見老人謂曰。文殊今住終南山。杜順和上是也。歸則順亡。

懷感居長安千福寺。念佛三年。見佛金色玉毫。得入三昧。乃製決疑論七卷。臨終見佛來迎。合掌而化。

德美於會昌寺西院。造懺悔堂。宇別般舟。一夏不坐。或止口過三年不言。或行不輟。通禮七衆。或節衣止。

四分除二。或去世想。專念西方。口誦彌陀。終于命。後於一時入室。稱佛。倏然而化。已上並

志通遊天台。見智者淨土儀。欣然會心。嘗至招手巖。

因陳大願。念阿彌陀佛四十八願。誦已。投身巖下。若

有神人捧之于樹。乃復整心。登巖曰。餘生可厭。大願

已發。惟海衆菩薩同相接引。再投而下。適在蒙茸草

上。又之復獲。寺衆昇歸。身心無損。後遊越之法華山。

一夕見白鶴孔雀行列西下。蓮華開合。光相現前。乃

起禮佛。趺坐而化。右晉

紹巖居錢唐湖心寺。專誦法華。期滿萬部。得生淨土。一旦有蓮華生于陸地。巖誓焚身供養。西方三聖具

越王俶力勸止之。又往投身曹娥江中。如有物扶其足。漁者救之。得不溺。吳越主於寶塔寺建淨土院。以居之。一旦見蓮華光照其身。越三日。欣然坐化。守真求與人譚起信論法界觀。常於中夜輪結無量壽佛往生秘密印。至天將曉。自覺身登淨土。舉目見佛。自俯伏。像前念曰。四十八願。能度我者。乃持香華入殿。供養就座而化。

吾恩姑賴人。住慈光講法華諸經。後於井中見白光出。乃絕食念佛。越三日。見梵僧捧鑪三遶之。曰。吾灌頂也。以汝所修同我之志。故從淨土來迎。次日恩升座。說止觀指歸。即座面西而化。殿間空中絲竹之音。

依佈西去。

義通高麗人。居四明寶雲。敷揚教觀。幾二十年。常呼人為鄉人。有問其故。曰。吾以淨土為故鄉。諸人皆當往生。吾鄉中人也。後右脇念佛而化。

知禮號法智。居南湖。述妙宗鈔。釋天台觀經疏。大章觀心觀佛之旨。曾於每歲二月望日。建念佛施戒會。動逾萬人。又撰融心解。明一心三觀。顯四淨土之義。後於歲旦。建光明懺。至五日。召大眾說法。驟稱佛號。數百聲。奄然坐逝。

遵式初居天台東山。徧行四種三昧。後住四明寶雲。結緇素。專修淨業。作誓生西方記。及居天竺靈山。於

寺東建日觀菴爲送想西方之法依無量壽經述往生淨土懺儀爲杭守馬亮述淨土行願法門往生略傳後居草堂示疾弟子問所歸對以寂光淨土至夜奄然坐逝

有基學于寶雲住太平興國寺一日示疾爲弟子廣談圓旨衆忽見西方現光空中奏樂師曰阿彌陀佛與二大士親至于此即右脇西向而化門人夢阿彌陀佛授記爲超壯如來或夢師坐青蓮華執如意對佛說法者法智歎曰卧病談玄睡終見佛是可敬也本如號神照住東山承天三十年誦經之餘集可人修法華懺一年與郡守章郇公結白蓮社一日十

說法與衆訣別江上漁人見雲端有僧西去明年啓塔尊容如生有蓮華產于塔前

慧才號廣慈晚居雷峯塔課佛不輟忽夢入一處若官室者人告之曰淨土中品是汝所生復見一殿勝麗殊絕人曰上品之生以待淨慈本禪師也才臨終果書偈面西趺坐而化

思義號淨慧住靈山二十三年退居草堂一日別衆而逝衆念誦久之忽復省曰適隨觀音大士行見金色沙門長身垂臂謂我曰汝報緣未盡過七日當遣迎至期趺坐而化瘞龕之日有赤雲垂布向西而沒元淨號辯才住上竺謝去居南山龍井焚指供佛左

三右二車修淨土觀臨終告其友道潛曰吾西方業成後七日去矣至期右脇吉祥而逝

從雅學于天竺海月誦法華經五藏彌陀經十藏金剛經四藏每字三拜禮法華三過自餘誦經禮拜無虛日。警生安養主客楊傑述安樂國讀三十首以贈之。此文並用天台義後於四月八日面西跏坐而化空中奏樂室內聞香

若愚居雪川仙潭學于辯才歸覺海建無量壽閣勸道俗四季開會念佛凡三十年將順世夢神人告曰汝同學則章得普賢行願三昧已生淨土彼正待汝師乃沐浴更衣命喪諷十六觀經端坐默聽畢忽云

淨土現前五當行矣遽書偈而化本は無家可得雲邊有路許誰知溪光搖落西山月正是仙潭夢斷時又於半月前書一頌云空裏千華羅網夢中七寶蓮華地踏得西歸路穩更無一點狐疑

智深號慈行學于海月歸嘉禾開長堂供二十年專志念佛常以漁業化人得往生顯驗者甚衆一日示疾客至問安談論如常時客方出門師即遷化人見紫雲向西而沒

處謙繼神照住白蓮一夕會弟子設香華諷普賢觀經阿彌陀經端坐稱讚淨土功德復告衆曰吾得無生日用有年矣今以無生而生淨土如入禪定奄然

而化

有嚴受業天台靈鷲依神照傳教晚居檀菴專事淨業作懷安養故鄉詩四篇為時所傳居山十年夢池中蓮華天樂四列乃作錢歸淨土詩後七日加趺而化塔上有光如月三夕乃隱

中立號明智居南湖常以淨業誘人其徒介然創六觀堂為東州之冠實師勉之也一夕謂侍者曰今聞異香吾意甚適即召觀堂行人俱集含笑言曰吾往生期至即面西坐逝

擇瑛桐江人依經論辨專雜修以不往生之易又述淨土修證儀二卷行於世今人稱阿彌陀佛真金

色一偈即師所撰也一夕有疾面西凭几念佛而化思照受業錢唐淨住刺血書法華經一字一禮如是十過誦十六觀經五藏彌陀經十藏法華一千部唱禮華嚴梵網淨土七經等凡二百七十卷每夜四更即起念佛解怠之人聞聲悚愧又於月二十三日率道俗繫念三聖常及十衆終師之世九三十年一夕語其徒曰夜夢佛金身丈六豈非往生有兆乎乃日請七僧以助念佛至七日晚漏身合掌厲聲念佛跌坐結印而化

宗利受業會稽天華修法華懺三載夢亡母謝曰荷汝懺功已生善道期滿見普賢從空而過復謁大智

律師增受戒法忽夢律師吐白珠令吞之覺神遊淨土見寶池蓮華行樹之相尋詣新城碧沼修念佛三昧者十年後入道味山築菴名一相越十五年謂弟子曰吾見白蓮華徧滿空中三日復曰佛來矣即書偈曰吾年九十頭雪白世上應無百年客一相道人歸去來金臺坐斷乾坤窄奄然而化

齊王號慧覺初於雪川寶藏建淨土會念佛者如蟻之衆後住上竺夜半頂彌陀像行道念佛一日謂空曰牀前多寶塔現非吾願也所欲見則阿彌陀佛也可爲我集僧念佛座鳴鐘繫念將百餘人頃之曰今已見佛即瞋目端坐而逝

仲閏所著教義號憲章集三個人受業於祥符子座見銀臺西方而至師曰吾一生解第一義誓取金臺今乃若此即座而化

瑩珂受業雪州瑤山徧參教席禪門以疾歸受業酒炙無所擇竊念戒業有闕恐從流轉令同住取戒珠師所編淨土往生傳對牀讀之凡讀一傳爲一首可既而擇一室而西設禪椅不食念佛三日夢佛太土謂之曰汝尚有壽十年且當自勉珂白佛曰設有百年閻浮濁惡易失正念所願早升安養承事衆聖佛曰汝志若此後三日當來迎至期令衆誦彌陀經師曰佛大衆皆至矣遂寂然而化

靈照住華亭起果每歲開淨土會七日道俗常二萬人夢中見三聖跪問之曰靈照一生期生安養可果願不觀音指之曰淨土不遠有願即生一日卧疾謂侍者曰吾往生有期矣即面西趺坐而化可久居四明開元常誦法華因坐化三日復獲語淨土事與十六觀境不異見蓮華臺皆標合生者姓名一紫金臺標云太宋成都廣教院熏法華當生此中次一金臺云明州又法華生此又一金臺云明州十二居士合生此中又銀臺標云明州徐道姑當生此中語訖復逝五年徐道姑亡異香滿室二十年孫岳士化天樂盈空感一郡人皆來送葬

宗本初參天衣懷禪師有契悟後住淨慈奉詔入住東京慧林召對延和殿密修淨土之業臨終安坐而逝雷峯才法師神遊淨土見一殿殊麗人曰以待淨慈本禪師又資福義師至慧林禮足施金而去人詰之答曰吾定中見金蓮華人言以俟慧林本禪師又小蓮華無數稱是以待受度人或有疑者云是退隱之人也

善本試華嚴經得度自淨慈詔住法雲賜號大通後歸杭州象塢專修淨業有僧定中見方丈彌陀佛示金色身一日告門人曰止有三日在至期趺坐面西而化

元無住靈芝弘律學尤屬意淨業一日會弟子經及普賢行願品加趺而化西湖漁人皆聞空中樂聲

道言會稽人靈芝之高第專修淨業臨終數日前見二神人長丈餘報言何不繫念於是大集道俗念佛三晝夜將畢自升座說法為衆懺悔至曉即座而化宗贖住長蘆作蓮華勝會錄勸人預名念佛忽夢白衣士謂曰欲入公彌陀會師秉筆問其名曰普慧已復云家兄亦告上名問何名曰普賢言訖遂隱師以聖賢幽贊乃更以二大士居其首師述勸修淨土頌有云三界炎炎如火聚道人未是安身處

友待多時收拾身心好歸去自想心存望聖儀直如念念勿生疑他年淨土華開處記取娑婆念佛時此頌最在人口蓮華勝會錄文及淨土頌十住普會時迎母居方丈東室勸念佛臨終前一日師夢母謂曰我見尼師十餘人來召師曰此往生之祥也

惟月居諸墅化城明律學修淨業一日有異僧來迎後二日微疾急呼同住道寧曰今見阿彌陀佛可高八尺駐立空中言訖而化

思敏依靈芝增受戒法專心淨業二十年一日偶疾請衆諷觀經者半月三日見化佛滿室臨終念佛聲出衆外酷暑留龕七日不變異香郁然

行誦誦四分戒本三日通徹學律于大智住明慶二
十年偶寢疾即設像命徒繫念數日忽起索三衣自
唱彌陀經厲聲念佛加趺而化

法持居化度寺修彌陀懺三年爐二指瘡受戒法造
西方三聖像誦觀經彌陀經如意輪咒願促閻浮之
壽蚤生安樂之邦一日小疾哭慟懇告願垂接引念
佛之聲聞於百步忽見佛身丈六立于池上即自言
曰我已得中品生端坐面西而化

慧亨居武林延壽號清照依靈芝習律專修淨業殆
六十年每接對賓朋必以念佛為勸建寶閣立三聖
像最攝殊特貴官江自任每敬師忽夢寶座從空而

下云是清照律師當升此座社交孫居士報師下遺
即在家作印而化師往炷香回謂其徒曰孫君已往
吾亦當行即請衆念佛復云彌陀口口稱白毫念念
想持此不退心決定生安養即端坐脫去

用欽居錢唐七寶院依大智學律聞其示衆曰生弘
毗尼死歸安養出家為道能事斯畢即標心淨土一
志不退日課佛至三萬尊神遊淨土見佛大士種種
異相謂侍者曰吾明日西行矣即集衆念佛黎明合
掌西望加趺而化

妙生會稽人習律學日踐淨土之業與大通本禪師
居潮山象場共明此道一夕會門人誦彌陀經就榻

端坐取臨終香焚之合掌迎顧嗟然而化

惟渥錢唐人杜門謝事閱大藏三遍華嚴法華諸經計之摠二萬卷晚年誦彌陀經二十歲一夕偶疾西向端坐作印而化

仲明居山隱報恩素無戒檢偶因感疾謂同學道寧曰我今心識散亂何藥可治寧云但隨息念佛爲上藥明即依法念之至七日力已困寧又令想目前佛像久之忽見二菩薩次又見佛迎接瞑目而化

沖益居錢唐淨光刺血書淨土七經復金書法華刻西方三聖像依止觀坐禪法念阿彌陀佛一日感疾不服藥拈香對佛懺悔請大衆助念佛誦彌陀經至

西方世界奄然而化

法宗依雷峯廣慈學教用止觀行法修大悲懺至九載然五指供佛每月率四十八僧同修淨土懺久之夢佛菩薩來迎後三日合掌西望而逝

晞湛山陰人少爲儒生忽厭世出家與瑩行人於院社同建無量壽佛殿專修淨業坐不背西久之常見三聖相一夕面西誦經正坐作印而化

曇懿居錢唐淨住以醫爲業晚年擅法華經修念佛三昧以平時所積供佛齋僧造像設浴如是二十年後微疾不服藥請利行人七僧念佛以助往生次日見蓮華其大如屋又一月梵僧到牀問訊夜半衆聞

念佛聲低泊然長往

大微兒時投錢唐法安法師初授彌陀經便能背誦及受具願宿門念佛爲不退僧常縱步後以忽聞划船笛豁然開悟因蓄一笛以自嬉有凌監簿者亦修淨業稱微爲淨土鄉長一日叩門曰淨土鄉弟子見微曰明且可相見於淨土今日誦佛正定耳翌朝人怪其不赴粥往視之見笛鉢禪椅先已焚卻加趺地上而化

思聰居錢唐法安日誦蓮華二部餘刻念佛未嘗談及世事忽謂弟子曰夜來見佛菩薩同來接引弟子曰恐是魔境不可便隨聰曰終時曾問有蓮華可證

越二夕命聲磬念佛喜曰佛來矣即奄然而化視曾前一掌許有文紅潤若開敷蓮華之狀

了義號水訥鐘離少師之曾孫十五舉進士過金陵見保寧璣公聞法開悟即從剃落隨所至處扁曰昨夢念念西方未嘗間斷祥公赴黃陂拂其偕行一夕祥夢師來別云西歸矣復見佛菩薩授以金臺越三日炷香宴坐含笑而化掌請五臺忽覺隨衆菩薩後行道有紫綬金章二人從其後師詰其名一僧引至殿旁觀玉牌金書王古葛繁二名字

慧誠居錢唐貧聖誦金剛經禮西方佛覺神遊淨土親覩佛容潛於山岫積薪爲龕入中念佛縱火自焚

祖南岳南岳刺血書阿彌陀經五百卷金剛經一百
卷法華經十部終二十七年皆用血書常時念佛期
生安養末年血乾骨立念佛之聲不絕一日至方丈
相對無別語即座而化眉間迸出舍利隨取隨生
法因住四明廣壽三十年真心淨業偶在疾集眾調
觀經稱佛號者三夕謂門人曰吾將行矣或請留偈
爲之書曰我與彌陀本無二二與不二並皆離我今
如此見彌陀感應道交難思議挺身端坐結印而逝
了然號智涌住白蓮二十四年夢兩龍戲空中一什
爲神人袖出書曰師七日當行既寤集眾說法大書
曰因念佛力得生樂國凡汝諸人可不自勉即沐浴

更衣集眾誦阿彌陀經至西方世界倏焉而化能仁
行人皆聞天樂之音祥光上屬天表

智仙號真教住白蓮講道十三年西向十年歷十二
時未嘗廢一夕微疾請觀堂行人誦彌陀經卷未終
而半脫能仁行人皆聞衆樂和鳴黎明始知師亡
思淨居錢唐北關姓喻常誦觀經念佛不輟善畫佛
必先靜室觀想一日畫丈六彌陀佛先見佛光遂悟
筆法之妙人因號喻彌陀建藍院名妙行飯雲水終
其身三百萬人忽靜默端坐心想西方越七日索臨
終香供佛加趺而化異香經旬
如湛試法華得度遍歷教席住烏鎮塔院日誦蓮經

二部佛號二萬聲一夕念佛端坐而化所著教義號假名集

思梵若西山日者謂之曰六月望師其終乎師曰造物焉能制修道之人汝言六月亡我且八月往至期沐浴坐龕中集衆端坐而化

淨觀居嘉禾寂光菴修淨土懺法十餘年謂弟子曰我後月二十七日當去至兩日前見紅華次日黃華滿室皆有化生孩兒仙帶結束及期入龕坐命衆誦經念佛頃之即脫去

利先居新城法慧日誦法華課咒念佛至中夜其聲哀切仰訴淒淒極苦願佛早垂接引得遂往生如是

十年晚歲屢感祥夢忽示疾命衆念佛西向凝望端坐而逝

師安受業烏鎮普靜通華嚴宗旨修彌陀懺觀想淨土二十年昕夕不廢十生多病臨終忽精爽謂弟子曰佛菩薩已降吾將行矣即端坐而化

如寶受業雪川覺華因聞自昔珍禪師夢設浴往生事遂發心開長堂浴二十年及建立佛像願求往生年八十一請衆設茶言別遽聞鐘鳴一聲衆皆驚異即向西加趺合掌凝望而化

顯超博州人親授金掬持三藏穢迹持咒之法濟病解冤計所得施利五萬緡入求壽常住後病中見佛

菩薩前迎蓮華徧滿仗樂雜奏弟子皆告留法師住
世救苦淨土變相漸漸隱沒乃復住十五年行咒救
入一日天樂異香佛及衆聖如前迎接即面西加跌
而化

有開居雪川千步寺專修淨業且暮不忘於歲旦請
衆念佛諷經至西方世界即瞑目長逝

道生居常熟興福造丈六彌陀像得縣令梅汝能施
財穀米即集衆諷經念佛陳白慟哭辭佛歸卧房
獨坐亡

若觀居烏鎮嘉會結十萬人念佛人各十萬聲期先
得生者次第汲引師誦法華光明二經日滿百部二

十年中誦滿六十萬部誓與群生莊嚴淨業一日空
相來訪相陪齋食忽索筆書偈趺坐而化

單異居餘姚龍泉誦法華五千部普賢行法彌陀經
各萬卷靜室禮佛不舍晝夜忽微疾集衆告曰吾安
養有期即面西累足而逝

智印居雪川祇園常想念淨土且夜無間病中集衆
誦彌陀經甫畢加跌合掌而化

元肇四明陸氏文章陸佃之族蚤歲習律閱大藏誦
道經萬部又刺血書蓮經一部律宗諸疏三部建炎
四年金虜破四明師時住湖心廣逼之北行至南徐
謂左右曰吾將西歸矣即聞笙歌之聲一時軍民咸

見師西望念佛而化

戒度習律受業接心晚住餘姚極樂病中作遺書別士夫道舊命衆誦觀經至法身觀厲聲念佛加跌而化

道琛號圓辯爲南湖八世祖於彌陀懺宴坐中見法智尊者於法華懺中見普賢放光每月二十三日建淨業會以爲常課道俗俱至一日示疾願平日一毫之善回向淨土集衆諷觀經不絕七日謂首座曰吾已見佛身聞異香乃沐浴更衣晝偈曰唯心淨土本無迷悟一念不生即入初住復令諷安樂行至深入禪定見十方佛喀然而化

有朋號牧菴住南湖一日坐青玉軒請行人誦觀經至眞法身觀復令大衆念佛留偈坐亡

妙雲四明楊氏號慈室自南湖退處溪口吳氏菴一且沐浴趺坐謂侍人曰吾有辦香藏之三十年矣擬臨終焚之用報佛恩今正其時及香光正熾起白佛陳意就座而化

晞顏字聖徒四明人一生不肯住山晚年居桃源厲氏菴專心念佛十餘年嘗扁小軒曰憶佛作偈有云隨波逐浪去翩翩彈指聲中七十年豈不向來知憶佛欲從老去更加鞭自憐億佛暮年深除佛無能寫我心誰道萬金爲客好終非一飯在家林臨終沐浴

更衣端坐念佛而化

了宣四明寶林肄業入南湖光嚴堂閱大藏預法華期懺二十七年與榮行人最相善一日詣榮室默坐榮問之師曰西歸有期難忘道義冀公淨土重會耳榮喜曰正所幸願忽示疾請衆誦彌陀經念佛之際端坐晝得曰性相忘情一三無寄息風不行摩訶息利合掌而化炎暑停龕七日顏色紅潤口角有微涎觀者以悵哀之異香噴人土庶聞之傾城來哀香徒愈滋闡維之勳舍利無算

善榮四明小溪周氏入南湖觀室十六年閱藏經修期懺金書法華楞嚴淨名圓覺光明諸經造彌陀像

遇法會則拈施自畫水墨觀音求者便與宣公亡後三年忽取經像分施親故請衆誦普賢行法經彌陀經念佛聲中加趺而化時以爲赴宣公淨土之約弟子海印高行以之

祖輝居四明郡城佛閣逢人但云阿彌陀佛說也說不得人竟以說不得和上目之鄞尉王用亨夫婦事之甚至一日到其家告別云我明日行矣及諸檀俱會即入龕端坐求甘瓜啖盡一枚念佛而化

如鑑四明塔山兩閣大藏長誦蓮經專志念佛晝夜不懈晚年菴居忽示疾請鄰菴諸僧繫念面西加趺含笑而化

祖新受業四明福源布衣疎食爲行清苦去寺不遠
有大姓方氏以菴延之乃於福源創淨土院造像栽
蓮月三八集道俗繫念一日往別方丈曰二月十五
日將西歸特來拜辭枯腸欲得索麪一椀主人如其
欲食訖竟往淨土院像前作禮云祖新將行奉別尊
像即歸菴集衆念佛遂出衆問訊曰祖新已拜辭如
來尊像已拜別福源方丈矣別衆道友十五日畢定
歸去願諸仁者勤心念佛蚤得相會即趺坐念佛遽
云佛已至此合掌而化

淨土立教志第二

